



# basic education

Department:  
Basic Education  
**REPUBLIC OF SOUTH AFRICA**

## **SENIOR CERTIFICATE EXAMINATIONS**

**SEPEDI LELEMETLALELETŠO LA PELE (FAL)**

**LEPHEPHE LA BOBEDI (P2)**

**2016**

**MEPUTSO: 70**

**NAKO: Diiri tše 2**

**Palomoka ya matlakala a dipotšišo ke 14.**

**DITAELO LE TSHEDIMOŠO**

1. Badišiša ditaelo ka šedi pele o thoma go araba dipotšišo.
2. O se ke wa leka go bala lephephe ka moka. Lebelela diteng letlakaleng le le latelago gomme o laetše dinomoro tša dipotšišo tša dingwalo tšeo o di badilego. Ka morago ga moo, bala dipotšišo gomme o kgethe tšeo o nyakago go di araba.
3. Lephephe le arotšwe ka DIKAROLO TŠE NNE:
 

KAROLO YA A:	Padi	(35)
KAROLO YA B:	Papadi/Terama	(35)
KAROLO YA C:	Kanegelokopana	(35)
KAROLO YA D:	Theto	(35)
4. Araba dipotšišo TŠE PEDI fela go tšwa dikarolong TŠE PEDI.
 

KAROLO YA A:	Padi	
	Araba dipotšišo KA MOKA.	
KAROLO YA B:	Papadi/Terama	
	Araba dipotšišo KA MOKA.	
KAROLO YA C:	Kanegelokopana	
	Araba dipotšišo KA MOKA.	
KAROLO YA D:	Theto	
	Araba dipotšišo KA MOKA.	
5. Diriša lenaneotekolo.
6. Latela ditaelo ka šedi go KAROLO YE NNGWE le YE NNGWE.
7. Nomora dikarabo tša gago go swana thwii le ka fao dipotšišo di nomorilwego ka gona ka gare ga lephephe la dipotšišo.
8. Thoma KAROLO YE NNGWE le YE NNGWE letlakaleng LE LEFSA.
9. Kakanyo mabapi le taolo ya nako: Šomiša tekano ya metsotso ye e ka bago ye 60 KAROLONG YE NNGWE le YE NNGWE.
10. Ngwala ka bothakga, ka mongwalo wa go balega.

**LENANEOTEKOLO****KAROLO YA A: PADI****POTŠIŠO 1: Kgati ya moditi – OK Matsepe****Araba dipotšišo KA MOKA.**

<b>NOMORO YA POTŠIŠO</b>	<b>MEPUTSO</b>	<b>NOMORO YA LETLAKALA</b>
1.1 <i>Kgati ya moditi</i>	18	5
1.2 <i>Kgati ya moditi</i>	17	6

**KAROLO YA B: PAPADI/TERAMA****POTŠIŠO 2: Di šitile Phaahla – SN Tseke****Araba dipotšišo KA MOKA.**

2.1 <i>Di šitile Phaahla</i>	17	8
2.2 <i>Di šitile Phaahla</i>	18	9

**KAROLO YA C: KANEGELOKOPANA****POTŠIŠO 3: Tša lefase ga di fele – MFC Matshela le ba bangwe****Araba dipotšišo KA MOKA.**

3.1 'Bošego ga bo rone nta'	18	11
3.2 'Monna o bolawa ke se a se llege'	17	12

**KAROLO YA D: THETO****POTŠIŠO 4: Direto tša Sesotho sa Leboa – Prof. DM Kgobe****Araba dipotšišo KA MOKA.**

4.1 'Go pokolo'	17	13
4.2 'Motsemollakoma'	18	14

**LENANEOTEKOLO/LENANEOTSHWAYOTSHWAYO**

Dira leswao (✓) go lenaneotekolo le le latelago go kgonthišiša ge e ba o lateletše ditaelo gabotse.

<b>KAROLO</b>	<b>NOMORO YA POTŠIŠO</b>	<b>PALO YA DIPOTŠIŠO TŠEO DI ARABJAGO</b>	<b>LESWAO (✓)</b>
A: Padi	1.1–1.2	1	
<b>GOBA</b>			
B: Papadi	2.1–2.2	1	
<b>GOBA</b>			
C: Dikanegelokopana	3.1–3.2	1	
<b>GOBA</b>			
D: Theto	4.1–4.2	1	

**HLOKOMELA:** Kgonthišiša gore o arabile dipotšišo go tšwa dikarolong TŠE PEDI fela.

**KAROLO YA A: PADI****POTŠIŠO YA 1: KGATI YA MODITI – OK Matsepe**

Bala ditsopolwa tše ka šedi gore o tle o kgone go araba dipotšišo.

**1.1 SETSOPOLWA SA A**

'Re leboga leo le tšwago go mmagorena, fela nnaena ke nyama go bolela gore ga go thušo ye ke e hwetšago mafahleng a ka ka ntle ga go ka ya go yena rragorena, e lego Kgoši Khomodi, gore a re feng mothepe woo mohlamong a tla tlego a dira bokaone ...'

'Lekgotla le tshwenyega ka lefeela, nnaena ke bona bokaone e le ge morwedi wa mmawešo yo mogolo a ka tšea madulo a rragwe ya ba taba ye e fedilego. Ka ntle ga fao gona go ka se tsoge go kgonegile selo.'

'Mo lebakeng le lengwe batho ba bolela taba ye e edimodišago ruri. Naa monna wa seboledi ge a akanya ka mokgwa woo o šupa gore morwedi yoo ga a swanela go nyalwa le go ya **go godiša magoro a mangwe?** Yeo yona e ka se tsoge e kgonegile lekgotla, a go re kgoši Khomodi a re feng yoo a tla tlego a re belegela ketapele.'

'Le tlile go mmitša eng ka gore go ba tlhatswadirope gona e ka se be yona gobane mmawešo go belega gona o belege? Re tshedišeng gona fao.'

'Le wena re hlathollele gore morwedi wa gagwe ge a tlile go tšea madula a rragwe, o tlile go bitšwa ngwetši goba eng.'

[Letl. 26]

- 1.1.1 Efa tswalano ya Kgoši Khomodi le setšhaba sa mo setsopolweng se. (1)
- 1.1.2 Tšweletša mohuta wa tikologo ya setsopolwa se. Fahlela ka dintlha TŠE PEDI. (3)
- 1.1.3 Ke eng se se hlotšego thulano ya dikgopolo tša banna ba? Efa dintlha TŠE PEDI. (2)
- 1.1.4 Go ya ka tsebo ya gago ya puku ye, na mmawešo ke mang? (1)
- 1.1.5 Ka dintlha TŠE PEDI hlaloša mohola wa poledišano setsopolweng se. (2)
- 1.1.6 Ke moya ofe wo o fokago setsopolweng se? Hlaloša ka dintlha TŠE PEDI. (3)
- 1.1.7 Hlaloša phapantšho yeo e tlišwago ke tšhomišo ya lentšu le le thaletšwego. (2)

- 1.1.8 Hlaloša maikutlo a gago mabapi le tšhomišo ya mantšu a a kotofaditšwego. (2)
- 1.1.9 Ke molaetša ofe wo o rwelwego ke polelo ya seboledi ge a re: '... o tlile go bitšwa ngwetši goba eng'? (2)

## LE

## 1.2 SETSOPOLWA SA B

'... Ke bona ge go hlanaselwa ebile le magadi a kgobokantšwe a bile a hlahletšwe ka lešakeng la Sefatamollo ...'

'Go ya gona a a ya.'

'Na re be re boletše bjang? A ke re o mpoeditše wa ba wa tiišetša gore a ka se ye?'

'Kae?'

'Ga Dianthona.'

'Ke mang yo a rego a ya ntshe?' ...

... Letšatši leo dikgomo tša magadi di tšwago ka lona e bile bolwetši go Nkgotlelele, fela ngaka ya gagwe ya mmotša gore bo tlile go fola ka mokgwa woo le yena a tlilego go fahlogela gore anthe e bo tle bo fole ka gona. Seo se ilego sa tloge se mmea pelwanatšhwana ke ge makgolwagwe Mmatshapho a ile a tiišetša yeo, a be a mmotša gore ke gona a tlogo go bona gore **thetho le ntepa ga a di tšwalela lefeela.**

... ka gore magadi ao ba be ba a tipile ka gona go phumola Dianthona megokgo ya ge a nyamišitšwe ke ba ga Ntweleng. Taba ye botse e ile kae, ngwanešo, ge e se yona yeo ka ge mogologolo a šetše a boletše gore se se nkganago se nthola morwalo? Ya re kgale le kgale barwedi ba motse woo ba be ba nyalelwa go ya go buša ga Ntweleng, ya tla ya re yoo ge ba mo kganyeditše gwa hloka moo a nyalelwago go ya go buša?

[Letl.75]

- 1.2.1 Utolla mohuta wa tikologo ya setsopolwa se ka go tsopola dintlha TŠE PEDI. (3)
- 1.2.2 Hlaloša tswalano ya baanegwa ba:
- (a) Mmatshapho le Nkgotlelele
- (b) Mmatshapho le Sefatamollo (2)
- 1.2.3 Molwantšhwa wa setsopolwa se ke mang? Fahlela karabo ya gago. (2)
- 1.2.4 Tšweletša mehuta YE MEBEDI ya dithulano tšeo di tšwelelago setsopolweng. Fahlela karabo ya gago. (4)

- 1.2.5 Ke thekniki efe yeo mongwadi a e dirišitšego ka mantšu a: 'Ke mang yo a rego a ya ntshe?' Fahlela karabo ya gago. (2)
- 1.2.6 Tšweletša mohola wa poledišano ya setsopolwa se. (1)
- 1.2.7 Akanya maikutlo a moanegi go ya ka sekafoko se se thaletšwego setsopolweng se. Fahlela karabo ya gago. (2)
- 1.2.8 Tšweletša molaetša woo o rwelwego ke sekapolelo se se kotofaditšwego. (1)

**PALOMOKA YA KAROLO YA A: 35**

**KAROLO YA B: PAPADI/TERAMA****POTŠIŠO YA 2: DI ŠITILE PHAAHLA – SN Tseke**

Bala ditsopolwa tše ka šedi gore o tle o kgone go araba dipotšišo.

**2.1 SETSOPOLWA SA C**

*(Le hlabile gabotse, ga go tonye, ga go fiše, eupša mafahleng a Namele le Theepe go fiša wa letšatši la moopšane ...)*

**NAMELE:** Monna thaka, gape moyamahlong a tau ga a akge matsogo. Bjale rena re ka dira bjang pele re eya kua kopanong ya maloko a komiti ya sekolo lehono?

**THEEPE:** Yeo o e bolelago ke ye kgolo, ga e nyake go potlakelwa. Ya ka kgopolo še: A re yo bonana le Morwadihlare le Mohwiti gonabjale pele nako ya go ya kopanong e fihla.

**NAMELE:** Re yo ba tsena bjang? Morwadihlare gape **ke moketla** wa motho. O nyaka go logelwa maano a go loya.

**THEEPE:** Ke na le mabotlelo a magolo a mabedi a bjala bja Sekgowa. Re tla ya re a swere, a ka se a gane ka gore o rata dino kudu.

**NAMELE:** Nna ke na le R50,00 yeo re ka rekago nama, gomme le yona ra yo mo fa ...

**NAMELE:** ... Go šetše iri e tee gore kopano e thome, re swanetše go dira ka pela. Pele re tloga, a ke go botše gore Mohwiti ke tla mo gapeletša go ya kopanong gore a yo tima mollo kua sekolong.

**THEEPE:** *(O phathekgile dino)* Go tla loka ka tsela yeo, eupša re swanetše go feta re bona mošemane yola Tihakolane gore le yena re mo retolle gore a re emele.

[Letl.22–23]

- 2.1.1 Ditiragalo tša setsopolwa se di diragala neng? Fahlela karabo ya gago. (2)
- 2.1.2 Tsopola dintlha TŠE PEDI tše di laetšago semelo sa Morwadihlare. (2)
- 2.1.3 Mantšu a ka mašakaneng a bitšwang? Efa mešomo YE MEBEDI ya ona go ya ka setsopolwa se. (3)
- 2.1.4 Na setsopolwa se se ka bapalega sefaleng? Fahlela karabo ya gago ka dintlha TŠE NNE. (4)



- 2.1.5 Tšweletša moya wo o fokago setsopolweng se. Fahlela karabo ya gago ka mabaka A MABEDI. (3)
- 2.1.6 Hlaloša molaetša wa polelo ya Namele ya mathomo o be o fahlele ka mehlala YE MEBEDI go tšwa setsopolweng. (3)

**LE****2.2 SETSOPOLWA SA D**

*(Sekolo se tšwele, Tlhakolane, Monawa, Motšhatšha le Namele ba dutše felo tsoko, ba swere ye thata, ebile Namele o išana diatla le Tlhakolane)*

- NAMELE: Ke na le sello, ke befetšwe ke bile ke duma ntwala lehono le.
- MONAWA: Aowa, Morutiši, e sego nna ke be ke na le kgopolo ya go tla go go lebogiša ka lengwalo lela o re ngwaletšego lona.
- NAMELE: Bothata bo tšwa gona moo. Yoo Tlhakolane o boditše Mašutša le Mokhuša gore ke nna ke le ngwadilego. Bjale ke gare ga kgabo ya mollo ge ke le mo, le mošomo o ka no ntshenyegela neng goba neng.
- MOTŠHATŠHA: Ga go motho yo bohlale yoo a tšhabago nnete ...
- NAMELE: Ga se ke tšhoge, eupša Tlhakolane ga a na tshwanelo ya go phula diphiri tša rena ge a ithapeletša gore a ratwe ke ofisi ...
- TLHAKOLANE: Le a bona ke eng? Yo Namele ke sehvirihwiri gare ga barutiši. Na yena o kgona ditaba le maano go feta ba bangwe barutiši? Ge eba o na le kgopolo yona ye a šetšego a e bolela; nna nka se boele morago.
- MONAWA: Aowa banna, tša banna di a rerwa, tša fela ...
- TLHAKOLANE: ... Bjale yo Namele a hlokomele, a se nna wa go bapalelwa.
- NAMELE: Nna ke bona se se ka ahlolago e no ba ge nna le yo Tlhakolane re ka fo nkgetšana mahwafa gwa fela ...
- MONAWA: Aowa, ntwala gare ga morutwana le morutiši! ...
- NAMELE: *(O a emelela, o feta pele ga Tlhakolane o a sepela gomme o itia Tlhakolane ka ntahle)* Ke a go kwa, o a re aga wena Monawa, ...

[Letl. 83–84]

- 2.2.1 Ditiragalo tša setsopolwa se di diragala nako mang? (1)
- 2.2.2 Ka dintlha TŠE PEDI tšweletša semelo sa Namele go ya ka setsopolwa se. (2)
- 2.2.3 Laetša tswalano ya Tihakolane le Namele go ya ka tsebo ya gago ya puku ye. (1)
- 2.2.4 Laetša ka dintlha TŠE PEDI tšeo di laetšago moya wa ntwā setsopolweng. (2)
- 2.2.5 Ke tekolanthago efe yeo e utollwago ke taba ya lengwalo la Namele setsopolweng se? (1)
- 2.2.6 Hlaloša ka dintlha TŠE PEDI kgegeo yeo e tšweletšwago ke maitshwaro a Namele go Tihakolane go ya ka setsopolwa se. (2)
- 2.2.7 Ke thulano ya mohuta mang yeo e tšwelelago setsopolweng se? Fahlela ka dintlha TŠE PEDI. (3)
- 2.2.8 Na mohola wa poledišano ke ofe go ya ka setsopolwa se? Efa dintlha TŠE PEDI. (2)
- 2.2.9 Ke thuto efe yeo e tšweletšwago ke poledišano ya setsopolwa se? Fahlela ka dintlha TŠE PEDI. (2)
- 2.2.10 Akanya maikutlo a Namele go ya ka setsopolwa se. Fahlela karabo ya gago. (2)

**PALOMOKA YA KAROLO YA B: 35**

**KAROLO YA C: KANEGELOKOPANA****TŠA LEFASE GA DI FELE – MFC Matshela le ba bangwe****POTŠIŠO YA 3**

'Bošego ga bo rone nta' LE 'Monna o bolawa ke se a se llogo'.

**3.1 SETSOPOLWA SA E: 'BOŠEGO GA BO RONE NTA'**

E be e le mpeng ya bošego ge monna wa Lobisa a kokota nomorong ya 804 lebatong la bošeswai, gona fao hoteleng ya Safari. Lebakeng leo la magarošapelo, diotswa tšeo tše pedi di be di sa fula morobe.

Monna yo wa batho o rile go kokota a re: 'Lobisa ke nna Thaere, mpulele rato ...'

Bomahlwaadibona bao ba ile ba thoma go gakantšhwa ke mahlale. Boitemogelo bjola bja thoma go kuelela le muši wa dikwekwele.

Motlelebeng o ile a topa mankgeretlana, a a phathekga ka lehwapeng mola dieta di le ka seatleng sa ngele. Diaparo tšeo di no olelwa le semetseng ka gare ga leswiswi.

Seetšana se sennyane seo se bego se bonala e be e le sa thelebišene ya mmala. Lobisa o be a sa tšhuma lebone ge a notlollela monna wa gagwe, Thaere.

Lebati le no re go bulega Motlelebeng a thula Thaere wa batho ka lebelo la kolo. Thaere o ile a šala a elwa le go tsoga mola Motlelebeng a šetše a fihlile lebatong la tlase ka *lifithi*. Gore o tšamile a ikapeša bjang ga go tsebe motho. Motlelebeng ge a tshela mmila wa Banket a lebile mokutwaneng wa gagwe High Point e be e ke ke mpšhe yeo e tšeešwego mae.

[Letl.80]

- 3.1.1 Efa nako le lefelo la ditiragalo tša mo setsopolweng se. (2)
- 3.1.2 Hlaloša tswalano ya baanegwa ba: (2)
- (a) Lobisa le Thaere
- (b) Lobisa le Motlelebeng
- 3.1.3 Ke thulano ya mohuta mang yeo e tšweletšwago ke setsopolwa se? Fahlela karabo ya gago. (2)
- 3.1.4 Tsopola mantšu ao a tšweletšago moya wa lerato go tšwa setsopolweng. (1)
- 3.1.5 Ka dintlha TŠE THARO, hlaloša tema yeo e kgathwago ke moanegi setsopolweng se. (3)
- 3.1.6 Utolla semelo sa Motlelebeng ka dintlha TŠE PEDI. (4)
- 3.1.7 Ahlaahla molaetša wa setsopolwa se ka dintlha TŠE PEDI. (2)

- 3.1.8 Akanya maikutlo ao a ilego a aparela Thaere ka morago ga go thulwa ke Motlelebeng. Fahlela karabo ya gago. (2)

## LE

### 3.2 SETSOPOLWA SA F: 'MONNA O BOLAWA KE SE A SE LLEGO'

Nako e be e gagabela go iri ya seswai mantšibua. Bana ba sekolo ba be ba re ba lapišitšwe ke go ja dijo tša melatša tša go se hlweke. Ba be ba lla ka gore ba fiwa magobe a go lala.

Mathapama a letšatši leo ba ile ba bolaya kgomo yeo e bego e fula kgauswi le serokolo sa sekolo. Ka metsotso ye mehlano fela ke ge ba šetše ba feditše go e bua gomme go šetše hlogo fela. Mong wa yona o tlile a e tseba ka leswao la mo ditsebeng. Yena o ile a tšea magato a semolao kgahlanong le sekolo.

Bana ba sekolo ba tsena ka lemati la lebenkele. Bangwe ba leba dijong mola ba bangwe ba leba setšidifatšing gore ba humane dino. Kgankga yena o ile a leba motšheneng wa tšhelete wo o bitšwago *till*. Ge a fihla a hwetša mogwera wa gagwe Lekota a šetše a eme moo. Lekota o be a maketše eke motho a bona sepoko. O be a makadišwe ke tšhelete yeo e bego e le ka moo motšheneng. E be e le la mathomo a bona tšhelete ye ntši ka tsela yeo.

Mabone a ile a tima ka moo lebenkeleng. Kgankga a ntšha thipa ka morabeng gomme a hlaba Lekota ka yona. Ge Lekota a wela fase Kgankga a tšea tšhelete gomme a leba kamoreng ya gagwe moo sekolong.

[Letl. 103]

- 3.2.1 Tsopola nako ya ditiragalo tša mo setsopolweng. (1)
- 3.2.2 Tšweletša dilo TŠE PEDI tšeo di hlolago thulano ya setsopolwa se go ya ka temana ya mathomo. (2)
- 3.2.3 Go ya ka tsebo ya gago ya kanegelokopana ye, na mongwadi o atlegile ka go tšweletša dintlha tše bohlokwa tša kanegelokopana? Fahlela ka dintlha TŠE NNE. (4)
- 3.2.4 Ka dintlha TŠE PEDI tšweletša o be o hlaloše semelo sa Kgankga go ya ka setsopolwa se. (4)
- 3.2.5 Na hlogo ya kanegelokopana ye e nyalelana bjang le ditiragalo tša yona? Fahlela ka ntlha TŠE THARO. (3)
- 3.2.6 Maikutlo a gago ke afe mabapi le ditiragalo tša setsopolwa se? Efa dintlha TŠE PEDI. (3)

**PALOMOKA YA KAROLO YA C: 35**

**KAROLO YA D: THETO****POTŠIŠO YA 4: DIRETO TŠA SESOTHO SA LEBOA – Prof. DM Kgobe**

Araba dipotšišo TŠE PEDI.

4.1 Bala sereto sa ka tlase gomme o arabe dipotšišo tša go se latela.

**Go pokolo – OK Matsepe**

1 Go go makala go fetša nka se ke,  
 2 Gore sefapano o se belegetše eng,  
 3 Na se lebetšwe go wena e seng  
 4 Neng ka ntle ga letšatši lela ke se seke?  
 5 O dungwa ke nna, maaka ga a botse,  
 6 Ka sona o tla tsena le nna ke a bona.  
 7 A ke go amogetše, le nna o tla mpona,  
 8 Go Mo khunamela go nkweša bose.  
 9 Magetleng le nna a ke se rwale,  
 10 Kgopolong ke be yo ke hlatswegilego.  
 11 E sego gore go go tsebafele ke se ke se dirilego,  
 12 A ke sepedišane le wena ke be wa gago o nthwale.  
 13 O phate ya Yo mogolo,  
 14 A ke go rete ka bjago bogolo.

[Letl. 41]

- 4.1.1 Sereto se ke sa mohuta mang? Fahlela. (2)
- 4.1.2 Tsopola mohlala wa sešura go tšwa seretong se o be o fe le mohola wa sona. (2)
- 4.1.3 Ke thekniki efe yeo moreti a e dirišitšego go tšweletša mošito mothalothetong wa 1? (1)
- 4.1.4 Akaretša sereto se ka dintlha TŠE PEDI. (2)
- 4.1.5 Efa moya wo o fokago seretong se. Fahlela karabo ya gago ka dintlha TŠE PEDI. (3)
- 4.1.6 Ke kgopolo efe yeo e tšweletšwago ke tšhomišo ya lentšu le 'phate' mothalothetong wa 13. Efa dintlha tše pedi. (2)
- 4.1.7 Ka dintlha TŠE PEDI efa molaetša wo o tšweletšwago ke sereto se. (2)
- 4.1.8 Tšweletša maikutlo a moreti go ya ka mothalotheto wa 8. Fahlela karabo ya gago. (2)
- 4.1.9 Ahlaahla mohola wa potšišorethoriki mothalothetong wa 4. (1)

**LE**

## 4.2 Bala sereto sa ka tlase gomme o arabe dipotšišo tša go se latela.

**Motsemollakoma – NS Puleng**

- 1 ... Ba tšwa khutlonne tša lefase,  
 2 Mebotong ya khutša ya boTranskei,  
 3 Ba tšwa Taung gaMoletsane Lesotho,  
 4 Bangwe masoding a bofanego a Batswana;  
 5 Ba tšwa boZambezi ba tshetše Limpopo,  
 6 Ba tlile ka diketekete tša diketekete,  
 7 Ba tšwa boPotokisi Bodikela bja Afrika,  
 8 Bangwe gae gaSekhukhune le gaMphahlele,  
 9 Le kua Swatseng bangwe ba phutše.
- 10 Ba tlile ka ditlhologelo tša mehuta,  
 11 Bangwe ba šikere, bangwe ba ikgonere;  
 12 Ba kgabile mafulomatala Motsemollakoma,  
 13 Ba phaletše nak'a phala e llile,  
 14 Ba tlogetše dirathana gae le diputswa.  
 15 Tšhepo ke go hwetša dilatšatlalakang ...

[Letl.54]

- 4.2.1 Efa sebopego sa ka ntle sa sereto se ka dintlha TŠE THARO. (3)
- 4.2.2 Tsopola mohlala wa poeletšo mothalothetong wa 11 o be o fe mohuta wa yona. (2)
- 4.2.3 Akaretša tematheto ya 2 ka dintlha TŠE PEDI. (2)
- 4.2.4 Laetša ka fao kgethontšu mothalothetong wa 11 e tšweletšago tlhalošo ka gona. Efa dintlha TŠE PEDI. (4)
- 4.2.5 Ka dintlha TŠE PEDI hlaloša mošomo wa sešura seo se tšwelelago temathetong ya bobedi. (2)
- 4.2.6 Hlatholla kgopolo yeo e tšweletšwago ke mothalotheto wa 15. (1)
- 4.2.7 Ke maikutlo afe ao a tšwelelago temathetong ya mathomo. Fahlela karabo ya gago ka ntlha E TEE. (2)
- 4.2.8 Tšweletša sekapolelo seo moreti a se šomišitšego setsopolweng o be o hlaloše mošomo wa sona. (2)

**PALOMOKA YA KAROLO YA D: 35**  
**PALOMOKA YA TLHAHLOBO: 70**